



DEO OPTIMO MAXIMO

UNI ET TRINO,

VIRGINI DEIPARÆ, ET S. LUCÆ

Orthodoxorum Medicorum Patrono,

QUÆSTIO MEDICO-CHIRURGICA,

QUOD LIBETARIIS DISPUTATIONIBUS

manè discutienda in Scholis Medicorum, die Jovis decimâ-Octavâ

Martii anni M. DCC. XXXIV.

M. FRANCISCO MERY,

Chirurgiæ Professore designato, Doctore Medico, Præside. *autore.*

An tenuium Intestinorum Vulnus lethale?

I.



CELERIS purus homo fortunatam hanc annorum decurrebat seriem, quam nec fœdabat hiems gelida, nec torrida torquebat æstas: res non erat labore duro parta, sed prodigus ager, munificentissimi Creatoris bonitate, parabat sine arte mensam; aëre puro dies lucebant sereni, noxque soluta curis breves spargebat umbras: torus erat pudicus, non tristis; dabat leges prudens simplicitas, menserat quæta, & salubre corpus viribus fruebatur ingenuis: non sidere maligno dira sæviebat morborum cohors, nec supremum diem, criminis vestigal, horrebat juvenus virilis nescia vulnere. At ex quo ingrata gens, omne ausa scelus, supremæ Majestati æqualem se

credere non horruit, fatale illud, *Morieris*, juravit Omnipotens. Jam jam ultione iustâ irati numinis persequente fontes, quàm subito (horrendum dictu) totius naturæ mutata facies! Aut igneus æstuat aër, aut gelido quassatâ frigore torpent membra: incultum segetem recusat tellus, solertique versatum manu pestiferum sapius depromit gramen. Terra, Pontus, Aër, quidquid tandem in humana gentis commodum salutemque dederat summus Opifex, furoris divini nunc Minister, maledictique obsignatum caractere, hominem undique ineluctabili vulnerat telo. Homò ipse profundioribus jam tenebris obcæcatâ mente, hominis adest hostis insensibilissimus. Ruit in pejus, huncque fallacibus inhonestæ voluptatis rap- tum illecebris, morbos mortemque appetere quis non crederet? De homine actum erat, nisi Medicinam creasset Altissimus & Medicum, qui nunc prudenti consilio morborum furores debellaret peritus, nunc doctâ manu & solerti, presens vulneribus ferret auxilium. At quàm tristis heu! nimium docet temporum series Arte doctâ nonnunquam plus valere malum, & sapius exstare vulnera, quæ brevi sequitur mors ineluctabilis. Sic Hippocrates * tenuium intestinorum Vulus lethale pronuntiat. Caveas tamen ne te incautum hujuscemodi vulneribus medicas afferre manus pigeat, quorum medelæ non obstat nec structura partium, nec repetita pluries experientia felix.

* *Apô. xviii.*
scit. 6.

I I.

A Piloro ad anum unicus propriè in conspectum venit canalis, mille inflexus circumvolutionibus reflexusque, qui Intestino- rum nomine designatur: hæc intestina, pro volumine diverso diver- sâque densitate, in Tenuia distinguntur & Crassâ, quæ quidem cum texturâ & compositione intrâ se discrepent, utraque triplici nomine parti placuit Authoribus. Tenuibus ergò assignantur *Duodenum*, *Je- junum*, & *Ileum*, per crassâ verò *Cæcum* intelligas, *Colôn*, & *Rectum*. De crassis silemus ad propositum non pertinentibus quædam de tenuibus delibaturi. Quadruplici tunicâ constat quodlibet inte- stinum, quintuplici, si tunicam Ruischii Cellulosam admittere pla- cet. Prima & exterior à Peritoneo producta Communis nuncupa- tur: stamine celluloso armatur intus quod Cellulosam Ruischii ef- format tunicam: hæc Mesenterio continua est facilèque in pingui- bus animalibus detegitur statu, pinguedine referta. Secunda Car- nea est sive Musculosa, duplici conflatur fibrarum ordine. Hic exter- nus, internus ille. Uterque licet sibi invicem ita striatè annectatur,

ut vix separari valeat, diversam tamen obtinet texturam; externus longitudinalis conspicitur & gracilis, internus crassior, quasi totidem circuli segmenta, totum intestini canalem transversè peragit. Sub nomine Nerveæ noscitur tertia, aspersa glandulis, vasculis conspicua, cellulisque instructa pluribus; majori cæteris donatur amplitudine, unde apparent rugæ, & valvulæ nascuntur. Quarta tandem sive interior vocatur villosa: Mollioris est substantiæ, Nerveæ quâ fulcitur magnitudinem adæquat, variasque ipsius ubique obducit cellulas. Vasorum fines sanguiferorum, lacteorumque principia sustinet; Hinc examine facto accuratiori cribrum meritò diceres. Hæc de omni intestino: Quædam nunc de quolibet intestino tenui observare juvat.

I I I.

DUODENUM, à longitudine duodecim quasi digitorum, statim atque à Piloro ortum traxit, retrorsum primo & obliquè descendendo paululùm incurvatur; postea versùs Renem dextrum secundâ, ut ita loquar, flectitur curvaturâ: Renali tandem arteriâ venâque renali & cavâ salutatis, sensim sine sensu ante aortam extrêmâque dorsi vertebrae à dextrâ ad sinistram ascendendo, novo flexu, qui ut extrema pars duodeni haberi potest, sinistram versùs renem excurrit obliquè. Tribus vel quatuor circiter à Piloro digitis, prominente uno hiato, cholidochi pancreaticique ductûs oscula recipit. Musculosam duodeni tunicam cæteris multò crassiorem aspicias. A Nerveâ ejusdem intestini villosâque tunicis plurimæ nascuntur plicaturæ, quas valvularum Conniventium insigniunt nomine. In principio duodeni valvulæ apparent nullæ, complures in progressu. Arteriam à cœliacâ sibi propriam vindicat Duodenum. Jejunum, quod sæpe vacuum conspicitur, ab ultimâ proficiscitur Duodeni curvaturâ. Hinc à sinistrâ ad dextram paululùm deflexum, circumvolutionibus variis superiorem regionis umbilicalis partem potissimum occupat. Tunicæ Jejuni eâdem ferè pollent texturâ ac Duodeni, sed crassâ minus. Valvulis præstat Conniventibus, quæ latitudine & numero plures, à se invicem nullatenus ferè recedunt. Quâ autem arte certò innotescere valeat Jejuni finis & principium Ilei, res sat obscura: à colore hîc intenso magis, illic minus, discrimen illud emanare censent alii; Alii à Valvularum obliteratione repetunt. Rectiùs, nî fallor, si Jejuno Ileoque in quinque partes æqualiter partitis, duas tribueris Jejuno, tres Ileo concesseris. Ileum infra umbili-

calem regionem juxta ossa Ilei situm imprimis animadvertitur : Je-
 juni circumvolutiones à lateribus & inferiori parte ita obvolvunt
 Ileum, ut à sinistrâ ad dextram per hypogastrium serpens, ibi Re-
 nem dextrum paulisper infra definat, valvulâque præstanti, quam
 valvulam Coli Bauhini appellare placuit, novo veluti Piloro crassius
 annectatur intestinis. Tenuium intestinorum substantiam vasa per-
 reptant numero copiosissima : arterias suppeditat Mesaraica supe-
 rior, ad Hepar & Portam abeunt venæ; Pari vago & Intercoastali
 debentur nervi, lacteis luxuriant insuper lymphaticisvè. Ea sunt
 quæ in hujuscemodi intestinorum specie observanda potissimum
 veniunt, in quorum vulneribus tristem, heu ! quotidie successum
 sortitur Chirurgia vel peritior. Nulla-ne ergò remanet spes ? tru-
 cique vultu, vulnerato semel crudelis semper mors prænuntianda ?
 absit. Horrendum, ingens licet immineat periculum, macte animo,
 laboremque non recuses pavidus. Tenuium intestinorum vulneris
 medela nec repugnat partium conditio, nec experientia relucta-
 tur.

I V.

VULNERIS nomen latiori acceptum significatione ad quam-
 cumque partium corporis disjunctionem solutionemvè conti-
 nui designandam usurpatur : Apud Medicos tamen invaluit usus
 hanc duntaxat solutionem continui titulo vulneris insignire, quæ
 in partibus corporis mollibus, non ab omni indiscriminatim sol-
 vente causâ, sed à corporibus duris & gravibus, quocumque infli-
 ctis modo applicatisvè ortum duceret ; Hinc violata partium mol-
 lium unio, quæ à clandestinis fluidorum intra corpus vel genito-
 rum, vel accedentium ab extra ictibus manat, vulnus propriè non
 est, sed Ulcus appellabitur : cùm autem vulnera non à diversis so-
 lum corporum à quibus insiguntur superficiebus diversas obti-
 neant formas, sed tùm naturâ & numero partium vulneratarum,
 tùm symptomatum, quæ vulnera concomitantur, majori vel minori
 ferocitate differant plurimum ; Principes idcirco quædam statuta
 sunt vulnerum differentiæ. Vel ergò impactum corpus acie aut
 acumine instructum reperitur, cedendoque aut pungendo partium
 unionem frangit ; vel nec acumine præditum, nec acie, mole sim-
 plici ac forti motu contundendo, partes secundum susceptam, motûs
 lineam à vicinarum contactu removel. Si primum, vulnus dixeris
 Incisionem aut Puncturam. Si posterum, Contusionem appellaveris.
 Et iterum vulnus aut cutem tantùm extinam aperit, penetratvè

profundiùs, nulla tamen ab eo inductâ carniû deperditione, non aperturâ majoris momenti vasorum illatâ, nullo ingruente gravi symptomate, & simplex nuncupatur; aut carnis subiectâ non mediocris adest jactura, vas plurimû ponderis refecatum, vulneratus tendo, dolor sævit, longè latèque serpit inflammatio, & Compositum nominatur. Tenuium intestinorum vulnus hîc loci latiori acceptum significatione fatemur ultrò, & per hujuscemodi vulnus quamlibet tenuium intestinorum continui solutionem intelligimus, quæcumque sit unionis violatæ causæ: Oriatur ergò ab externo corpore gravi impetu vibrato, à tacitis fluidorum intrâ corpus latenter agentium ictibus trahat originem, proficiscatur tandem ab imperitâ Chirurgi manu, ut in variis, quas diversæ postulant Herniarum species, operationibus, *Bubonocèle* præsertim, accidit sæpiùs, hanc solutionem continui, siue sit simplex siue composita, vulnus appellare placet cujus medelæ non repugnat partium natura. Absit negare velimus à tenuium intestinorum vulneribus compositis præsertim periculum imminere & quidem præsentissimum. Nonne etenim vulneratis tenuibus intestinis, bilis cum succo chyloso in cavitatem abdominis partim depluens, corruptionem partibus contentis importat? Ignoratur-ne hæc intestina motu gaudente *peristaltico* fortiori, læsaque, contenta tantò vehementiùs extrâ cavitatem protrudere? quis nescit ab eorum læsione inflammationes suboriri sæpiùs, spasmos, convulsiones? compertum tandem nonne est tria hæc intestina, utpotè minùs musculosa, difficiliùs coalescere? Quid inde? vulnus erit periculi plenum, non lethale. Manum semper operi admoveat Chirurgus. De educendis peregrinis quibuscumque corporibus vulnere infixis sollicitus primò, partes divisas, si externè promineant, suo loco reponat. Partium labra ad intimum, quantum patietur substantiæ jactura, urgeat contactum, roborantibus modò, putrefactionemque arcuentibus remediis utatur prudens, modò, prout postulaverit temporum opportunitas, lenientibus demulcentibusque spasmos astringentia misceat & consolidantia. Venæsectionibus sæpiùs repetitis compescatur inflammatio, tenuissima dicæta & fame, ut ita loquar, emaciandus æger, ne major sæcum proventus adveniens, & unionem prohibeat & augeat symptomata. Sic sæpiùs vel in magnis etiam vulneribus muscularium ope fibrarum coalescent partes, vel si majus sit substantiæ dispendium, „quod carnis deest partibus, „(ut ait Magister in arte Medica magnus *Hecquetus** noster) ex „partium vicinâ suppletur, quæ suas partibus vulneratis mutuando

* *Comment.*
in *Hipp.*
sect. 6.
Aph. xviii.

» applicandoque carnes, gluten commodant, mutuoque adhæsi
 » concesso, cicatrici tempus suppeditant, modum, materiem, in-
 » strumentum ». Nec ab opere deterreat Chirurgum materia è
 vulnere depluens, Musculosarum tenuitas fibrarum, Nervearum nu-
 merus, motusque partium unioni resistens. Nonne vesica motu
 donatur & quidem plurimo, salibus urinæ potentissimis alluitur
 indefinenter, totaque Membranacea ferè & Nervea conspicitur.
 Quàm tamen graviter erraverunt, qui ipsius corporis & fundi vul-
 nera lethalia decantabant, sat superque demonstravit, tam felici
 successu in operatione Lithotomiæ per Altum apparatus, in fun-
 dum vesicæ, larga sæpius à peritissimo Doctore Douglas incisio
 peracta. Mutatâ parte de Intestinelorum vulneribus res narratur.
 Sed tenuium Intestinelorum vulneris medelæ non obitare partium
 texturam, tutissimus est demonstrandi modus, testem appellemus
 experientiam.

V.

DUOBUS circiter ab hinc annis in mulierem septuagenariam,
 orbatam visu infirmâque admodum gaudentem valetudine,
 celebrata est *Bubonocæles* operatio. Mâle affectum erat intestinum
 tenue *Gangrenæ*que suspectum. Lotum illud calido vino spiritu-
 que vini irroratum, in abdominis canitatem reponitur. Quæ gra-
 vissima intestini strangulationem comitata fuerant symptota,
 post operationem subito remiserunt. Horâ ab operatione unâ la-
 xata est alvus; Per novem dies, nullo exasperante febrili motu,
 tranquilla remansit ægrotans: At die decimo excrementa per vul-
 nus erupere biliosa. Materia erat & adeo luxurians, ut totus om-
 nino fœdatus est lectus, & acris ita, ut extimâ cute abdomen &
 crura spoliaverit. Per sex vel septem hebdomadas per vulnus
 prodierunt fœces; At duobus circiter mensibus exactis, con-
 solidatum est vulnus, hodieque sat firmâ fruitur valetudine
 mulier. Viginti jam elapsi sunt anni ex quo eadem operatione
 tentata est mulier vetula. Ipso tempore operationis, diebusque
 primis sequentibus, quæ in operatione relatâ modò acta di-
 ximus, sunt pariter observata. At septimo manè, lintea cu-
 juslibet generis materiâ stercorali & biliosâ contaminata in-
 venit Chirurgus. His è vulnere extractis, materiâ ejusdem na-
 turæ, quantitate notabili, cum impetu profiliit foras. Diebus
 quindecim absque ullâ sensibili mutatione idem permansit status:
 Tunc solidiorem adepta sunt consistentiam excrementa. Die vige-
 simo per Anum determinata sunt paululum, vividiorique donatum

colore apparuit vulnus. Vigesimo-octavo tandem, nullâ jam per vulnus prodeunte materiâ, octo dierum spatio, ita felici obductum est cicatrice, ut optimè convaluerit mulier. Nonne per omnes Belgicæ-regiæ civitates famosus fuit circulator ille, qui ut facilius strangulationi intestinorum in Herniis succurreret, largâ incisione secabat intestinum, illudque contentis per aperturam vacuatam in abdomen reponebat. Audaci hujuscemodi methodo & temerariæ insistendum licet non sit, cum in pluribus tamen felicem habuerit exitum, tenuium intestinorum vulnus lethale non affirmandum demonstrat evidenter. Nec reponat aliquis nos in referendis curationibus, à nobis duntaxat cognitis, totos incumbere. Authores, & quidem melioris notæ adire non pigeat, *Seidelium*, *Hollerium*, *Gemma*; felices pariter expertos fuisse successus experiemus. « Cuidam (inquit *Hollerius*) perforatus venter acuto ense, intestina tenuia vulnerata & pars crassorum. Exierunt intestina per vulnus & stercus: desperatus erat à Medicis, sed longâ curâ convaluit. Sic suam aperit mentem *Gemma*. « Vidi quibus intestinorum portiones satis effatu dignæ, tum per abcessus tum per vulnera sunt ablata, & tamen vivunt, unamque in rebus desperatissimis divinæ bonitatis & fortitudinis gratiam profitentur: assertioni tandem nostræ metam imponet atque cororidem *Seidelius*. Sic loquitur. Pertuso perfectovè tenui quopiam intestino lethale est, inquit *Hippocrates* Aph. 18. Sect. 6. Huic aphorismo planè adversum ac repugnantem casum paucis ante annis observavi in cive quodam Gryphswaldensi sexagenario, cui cuni diebus tribus continuis alvus obstricta esset & vehementissimis circa umbilicum doloribus infestaretur, portionem purgantem exhibui, quâ primâ vice nec alvum deposuit, nec dolores quicquam remiserunt. Eâdem verò, tribus diebus exactis, repetitâ, & alvus laxata est, & dolore sublato, tumor quidam in Epigastrio circa inguen dextrum erupit. Tonsor ad eum vocatus, tumorem convenientibus remediis maturatum scalpello aperuit, ex quo pus sanguini permixtum effluxit. Octavo die post apertionem tumoris, cum ulceri medicamenta mundificantia & detergentia linamento excepta admoveret, potus, unâ horâ postquam ab ægro assumptus esset, per vulnus emanare cœpit tanto impetu, ut simul linamentum è vulnere propelleret. Sequentibus diebus etiam panis, caro, & reliqui solidiores cibi, aliquo modo alterati per idem vulnus effluerunt. Hâc re territus æger jam planè de salute suâ actum esse censuit. Cum verò aliquot

Vide Schenkii Obs. Med. L. 3. de Vuln. intest.

„ diebus potione ex radicibus & herbis quibusdam constringenti-
 „ bus ac consolidantibus preparatâ uteretur , & vulnere exterius
 „ sarcotica adhiberentur , primo cibus , deinde etiam porus paula-
 „ tim substitit , ac vulnus intra sex septimanas integrè ac perfectè
 „ sanatum est. „ At , objiciet aliquis , Quot tamen vulneratis se-
 mel tenuibus intestinis , morte præcipiti rapiuntur quotidie illud
 fatemur iterum atque iterum. Hinc tenuium Intestinorum vulnus
 periculi semper & alex plenum. Sed etiamsi unus duntaxat nobis
 suppeteret , casus constans felixque , in quo vulnus tenuium Intesti-
 norum medelam admisisset , concludere meritò possemus. Ergo
 curationi vulnere tenuium intestinorum nec textura partium re-
 pugnat , nec reluctatur experientia.

Ergò tenuium Intestinorum Vulnus non lethale.

DOMINI DOCTORES DISPUTATURI.

*M. Desiderius - Claudius
Fremont.*

*M. Joannes - Baptista Du
Boss, Serenissima Princi-
pis prima Dotaria de
Conty Medicus , & Pro-
fessor Regius.*

M. Claudius du Cers.

*M. Bernardus de Jussieu ,
Regie Scientiarum Aca-
demia , Regiaque Socie-
tatis Londinensis Socius ,
& in Horto Regio Bota-
nices Prodemonstrator.*

*M. Guillelmus - Josephus
de l'Espine.*

M. Claudius Vergne.

*M. Franciscus Mery , Chi-
rurgia Professor designa-
tus & Alnus Præses.*

*M. Ludovicus-Hieronimus
Cosnier.*

*M. Jacobus-Benignus Win-
slow , Regie Scientiarum
Academia , Societatisque
Regie Berolinensis So-
cius , Teutonice Lingua
Regius Interpres.*

Proponerebat Parisiis ADRIANUS MALAVAL , Parisinus ,
 Baccalaureus Medicus , A. R. S. H. 1734.
 à sextâ ad meridiem.